

福建等處承宣布政使司爲遵

旨議奏事：乾隆十五年正月二十四日，奉准戶部咨河南司案呈所有本部議覆河南布政使富明條奏：「買賣田產將契尾粘連，用印存貯，申送府、州、藩司查驗等因」一摺，于本年十二月十二日奏，本日奉

旨：「依議。欽此。相應抄錄原奏，并頒發格式，行文福建巡撫欽遵辦理可也。」計粘單一紙、格式一張，內開：「該臣等查得該布政使富明奏稱：『部議多頒契尾以後，巧取病民，緣業戶契尾，例不與照根同申上司查驗，不肖有司，其與給民契尾，則按數登填，而于存官照根，或將價銀刪改，請嗣後州縣，于業戶納稅時，將契尾粘連，用印存貯，每遇十號，申送知府、直隸州查對，如姓名、銀數相符，即將應給業戶之契尾，并州、縣備案之照根，于騎縫處截發，分別給存。其應申藩司照根，于季報時，府、州彙送，至知府、直隸州經收，稅契照州、縣申送府、州之例，徑送藩司』等語。查雜稅與正賦，均由州、縣造報該管府、州核轉，完納正賦，填寫聯三串票，從未議將花戶收執串票，與申繳上司底串，并送府、州查驗，誠以花戶照票一繳府、州，則給領無時，弊端易起。今稅契雜項、契尾與照根并送查發，是雜項更嚴于正賦，殊與政體未協，況契尾一項，經一衙門，即多一衙門之停擱，由一吏胥，即多一吏胥之索求，甚至貪緣爲奸，指勒驗查，以至業戶經年累月求一執照寧家而不可得，勢必多方打點，需索之費，數倍于前，將來視投稅爲畏途，觀望延挨，寧匿白契而不辭，于國課轉無裨益，應將該布政使奏請州、縣經收稅銀，將契尾粘連存貯，十號申送府、州查發，并知府、直隸州照州、縣例，徑送藩司之處，均毋庸議。至于貪吏以大報小，奸民爭執訐訟，實緣法久弊生，不可不量爲變通。臣等酌議，請嗣後布政司頒發給民契尾格式，編列號數，及前半幅照常細書業戶等姓名、買賣田房數目、價銀、稅銀若干，後半幅于空白處預鈐司印，以備投稅時，將契價、稅銀數目大字填寫鈐印之處，令業戶看明，當面騎字截開，前幅給業戶收執，後幅同季冊彙送布政司查核。此係一行筆跡，平分爲二，大小數目，委難改換，其從前州縣、布政司備查各契尾，應行停止，以省繁文，庶契尾無停擱之虞，而契價無參差之弊，于民無累，于稅無虧，侵蝕可杜，而爭訟可息矣。如蒙
俞允，俟
命下之日，臣部頒發格式通行，直省督撫一體欽遵辦理可也。」等因，咨院行司奉此

計開 業戶林志聰買黃仁等田埔一所坐落 後湖中埔仔用價銀貳拾柒

兩陸錢 納稅銀 捌錢貳分捌厘

布字壹萬陸千肆百玖拾陸號右給 業戶林志聰准此

道光貳拾貳年拾貳月

日